

Kon Por Ta?

Awe ta kima Momo pa klousurá karnaval. Awe ta dia pa gosa, fiesta, djòdjò! Mañan, en kontraste, ta dia pa tuma krus na frenta pa inisiá Kuaresma, un temporada solèrne pa deshasí (supuestamente) di piká i deseo karnal, un tempu pa evitá fiesta.

Henter e filosofia tras di Karnaval i Kuaresma ta basá riba e idea kiboká ku **bo mester gosa piká PA bo por deshasí di piká.**

Kon por ta ku nos ta aseptá un kreensia tan ridíkulo? Nos ta rechas'é kategórikamente den otro konteksto! Ningun hende ta instruí un gañadó, “Pa stòp di gaña, saka hopi mentira pa algun siman, anto lo bo por papia bèrdat.” Nos no ta bisa un ladron, “Durante e siguiente luna kohe hopi kos di hende, pa despues bo por keda sin hòrta.” Ningun hende ta bisa un buraché pa dal un Amstel i Polar tras di otro awor aki, pa e por lubidá serbes despues! Ningun hende ta bisa un drogadikto, “E manera pa ‘kick af’ ta pa gosa hopi droga pa un periodo promé!”

Echu ta, e kreensia ei ta **hinkábo mas den un mal kaminda.** E ta siña, “**Evitá disiplina propio pa desaroyá mas disiplina propio!**” Absurdo! Kada serbes ta hasíbo mas adikto di alkohòl. Kada mentira i akto di ladronisia, ta hasié mas fásil pa gaña i hòrta. Kada uso di droga, ta hasié mas difísil pa kibra e gara di droga. Ta p’esei mes nos tin e lema, “Djis bisa ‘nò’!”

Si ta bèrdat ku hende mester djòdjò den piká pa nan por stòp di hasi piká, anto e lema “Djis bisa ‘nò’” ta kruel i ta obligá e drogadikto pa keda den gara di droga mas tempu. Ma, si e lema “djis bisa ‘nò’” ta bèrdat, anto nos idea karnavalesko ta mentira. **Tur dos no por ta bèrdat!** Klaramente e kreensia “djòdjò pa deshasí” ta un baka di mentira (**ku nos ta gusta kere!**)

Pakiko Komishon di Aids a parti kondon durante karnaval? Pakiko gobièrno di Kòrsou a avisá: “Un solo relashon (íntimo) deskabeyá, por ta sufisiente pa laga un persona ku algu desagra-dabel, tin biaha pa (e) restu di su bida. Por trata di salimentu no deseá na estado, Aids òf otro malunan venérikò. Sòru pa no keda atras ku un rekuerdo di karnaval, ku lo duel bo despues?” Pasobra durante karnaval hende ta gosa piká un bòl...i e pikánan di karnaval ta problema serio!

Komprendé bon! Dios nunca a bisa “Baha man na piká.” Tampoko El a bisa, “Posponé piká.” Beibel ta bisa bon kla ku nos mester **bandoná piká, bira lomba pa piká, rechasá piká.**

Algun ta lamentá ku nos normanan i balornan ta bai pèrdí. Ma durante karnaval, nan ta djòdjo i kontradí tur nan palabranan bunita. Nos ta yama nos mes “kristian” ma durante karnaval ta ignorá siñansa kristian. Segun Skritura, **bo por ta un kristian, òf bo por ta un karnavalista. Ma bo no por ta tur dos pareu!** Bo tin ku disidí entre nan dos. 1) Si bo ta skohe pa yama bo mes “kristian”, bo tin ku sigui instrukshon di Beibel 24 ora pa dia 365 dia pa aña. 2) Si bo por skohe pa ignorá Palabra di Dios, por fabor no yama bo mes “kristian”. **Un hende ku ta yama su mes “kristian” i ta desobedesé Kristo ta un hipókrita!**

Ningun hende ta nase kristian destiná pa shelu. Hesus a bisa “*Boso ta di boso tata e diabel...*” (Juan 8:44) indikando ku nos tur ta nase den famia di Satanas, destiná pa sufri na fièrnu. Pa skapa fièrnu, bo mester nase den famia di Dios, **bira** un yu di Dios (kristian). “*Ma tur esnan ku a risibiE (Hesus), na nan El a duna e derecho pa bira yunan di Dios, esnan ku ta kere den Su nòmber*” (Juan 1:12). Bo ta **bira** un yu di Dios ora bo bandoná piká, i **konfia Hesu-Kristo so** pa kambia bo destino. Ningun religion, santu, òf deboshon por hasi esei.

Kon por ta ku nos ta kere ku djòdjòmentu den piká lo yuda deshasi di piká...anto pa 40 dia so? Kon por ta ku nos ta yama nos mes “kristian” anto ta gosa un fiesta tan pagano? Kon por ta ku nos ta kere ku nos ta na kaminda pa shelu ora nos ta komportá nos manera hende na kaminda pa fièrnu? Kon por ta?